

1 PIIHTER

Wargahng Umodho Naa Agweed Piihtere

Rob Ke Nying Warga

Wargahng Umodho gihr Piihter anaa agweede ke yihr jo yiho e cuohn ne "Yaa Juog naa akwanye." Ge anahg nyoge maa anaa akeedho ke bang yi piny Aacya Gihn Thiin. Warga gihn ni agweed kaa nying ciimh cwihny yaa kwaan ngo, bang gihn bahng anaa akedh rog gen keter ke nying gihn ayiih gene lum Juog. Cwihny yaa nu aciihm Piihtere kaa dhe yoohn ber Ciig Beer ke nying Jeacuu Kriihjto ngaan gaahn gene. Ke nying thone maa cahre kedea ciig gihre kejea e uduu. Noonno, e ge dhiil yiho uguum gene giih bahng. Kedea unghy gene ngo kejea yiho gihr gen e ne yea med, abea keehd maano e akweehn me beer uyoad gene "Cahng uduu Jeacuu naa akwany Juoge."

Piihter nying yaa kwaan warga gihn ni, akwaye beere ge ubeehdo ke dhe yoohn daahd Juoge.

Kaa Acaan Luube

Lum umodho 1:1-2

Gaahno maa adiehr 1:3-12

Beehdo e adhemuohm tooro rog 1:13-2:10

Gihn tiihy jo yihe nea giih ajohr pahdh wudh gen 2:11-4:19

Kar kaahn jo yiho 5:1-11

Gug luube 5:12-14

1 ¹Yihr yaa akeedho ke yihdh miehy Poantuj kedea Galaadya, maa Kapadoacya kedea Aacya kedea Bihdhihnya. A Piihter ngaan aohr Jeacuu Kriihjte, a ne gweehdo yihru. ²Wu ge beehda aleye wihi piny kan ge angahy Juog Wuur kedea umiege wun kuu umodho kedea Wahy Juog en ne yug wun ne nyoge me beey bang utiihy ke lum Jeacuu Kriihjto kedea bang ne yor wun ke reme. Beehn Juoge cube deeh muuny kedea doohr me ne cohg yihru.

Gaahno Maa Adiehr

³Nying Juog ge Wur Ruohdho Jeacuu Kriihjto, ke wuro bang gihn wo angwaahne keraahyo udoohngo ne nyoge maa anyuol nyaahn. Wahy me nyaahn acube yihro, me weehg wo gaahno ke dhe yoohn cahro gihr Jeacuu Kriihjto naa acahre uyedhe maalo yi dahg nihn batien naa athowe. ⁴Kaano arumo e yihru unaa giih me beeye maa aguog Paar Maalo muu ulagu. Giih me ge be kwaahl kedea ge be tob maa ge be rahny. ⁵Giih nu beey ge giihu wu yaa koar Juoge keehd tee gihre ke nying yiho gihru beere wahy me be gug naa agwiire ke nyingu paare yoada yoado cahng gug piny. ⁶Kea noonno mihn cwihnyu ne cohg bang gihn giih me beeye ge nud wong maalo ke nyingu. Abee keehd maano e wu ukuong toohng yihdh giih me reje umodho. ⁷Wu utoohng yihdh giih reje umodho beere kaa ayiihu kii ngo ke tumo nea yea teeg wale giih nyooro ge ne yea. Ke tumo wa gihr ngiihnyo maa aleehdho upiire. Abee yiho gihru wihe ne maalo rih ngiihnyo bang gihn ngiihnyo beehda gihn muu uthumo. Nea yiho gihru atum uyoade e ngo teeg, e leej kedea puoyo me duohng uyoada cahng uduu Jeacuu Kriihjte. ⁸Ngo anhyaaru keehd me bahnge kihde kuu aniidu. Abee keehd me bahnge ngo be niidu awaahn ni, e lume ayiihu kedea yihru ne med cwihny me duohng muu uneehno ne dahr. ⁹Cwihnyu med bang gihn akoohg gihn ucub yihru ke nying gihn gaahnu ngo beehda boadh wahy ge uyoada.

¹⁰Anahg boadh wahy e naa apiih agamloohngjuoge ne dead yea kedea ucaar gene muuny gihn ubeehn Juoge ne cubo yihru. ¹¹Yaa gamloohngjuog ge ake peehyo ke nying giih raahm rog kedea giih moar wihj ge utiihy rog gen rih Ngad Boadh nyoge. Giih nu anahg Wahy Juog ge aohr Jeacuu Kriihjte, e naa anaa arob gen yi aduun yaa agamloohngjuog. Ge ake peehyo thioh kejea weehne e nuu utiihy giih nu rog gen kedea rog gen utiihy gene ke rih ngaa. ¹²Ngo anaa arob yihr gen kejea padh ke nying mar ngud gen abea anahg ke nyingu. Run ngo ge giih nahgu yihdh gen. Awaahn ni Ciig Beer ge arob yihro cang. Ciig Beer ge apuohny yihro kaa teeg Wahy Juog naa aohr ke yoohn Paar Maalo. Keehd wuohdjuog e cwihny gen ne bang ngey yihdh Ciig Beer.

Beehdo E Adhemuohm Toor Rog

¹³Kea noonno thubu kaa awaahn kan ke gwiir rogu ne tiihy gihn ubeehn kedea koaru rogu beer mee kedea piihu ne gaahn muuny gihn ucub nea Jeacuu Kriihjto uduuo. ¹⁴Lihngu lum Juog bang gihn wo beehda nyethen Juog kedea wiiu dhog yiehdh acoon ge na beehdu kii ngo e gihn maa angahyu atooro. ¹⁵Kwaad giih tiihy nahg gene giih me yihdh gen tooro giih adhemuohm wa ka nahg Juog ngaa me ree tooro adhemuohm. ¹⁶Agweed yi kitaab Juog naa,

"Beehdi e rihi tooro adhemuohm

bang gihn riha tooro adhemuohm."

¹⁷Me neehn kaano kwahyu yihr Wuru ge ne Maalo kedea ngo ngahyu kejea be luuo ke tiel, kea noonno beehdu e wu lwaahr keehde wa ka nahgu aleye wihi piny kan. ¹⁸Juog gihn maa acube piny nud ne kahl wun oogo yi yoohn rwaahny wun ge adaahd ge wuru wun ke kahlo kii ngo. Gihn acub Juoge piny padh gihn me thum wa mar dhaahb wale damaro me neehn kaano ngahyu ngo. ¹⁹Juog beehda Ngad Boadh nyoge e naa akaabe ne gihr remo ne nahg piny ke nyingu. Gihr remo me ngiene teeg kedea adhemuohm tooro ree. ²⁰Ngo akwany Juoge ne gihr remo me ngiene teeg ke coon e wihi piny poohd kuu acag, unahge kaa awaahn yi gug nihn e naa abeehn Juoge ukahle gihr remo oogo ne naah ne dooj

1:1 2:11; Jeam 1:1 1:2 2:9; Rom 8:29; Epi 1:4; 2Th 2:13; 2Pii 1:10; : 1:19 1:3 1:23; 2Kor 1:3; Tii 3:5 1:6-7 2Kor 4:17; Jeam 1:2-3

1:7 1Kor 3:13 1:8 Jon 20:29; 2Kor 5:7 1:9 Rom 5:2; 6:22; Epi 1:14 1:10-11 Luk 24:46; 1Kor 15:3-4; 2Pii 1:19-21

1:12 Epi 3:9-10 1:14 Rom 12:2; Epi 2:3; 4:17-18 1:17 Mat 6:9; 16:27; Rom 2:6; Jeam 2:1; 1Pii 4:5

1:18 Mat 20:28; 1Kor 7:23; 6:20 1:19 1:1-2; Jon 1:29; Tihiy 20:28; 1Kor 5:7; Epi 1:7; Judea 9:12 1:20 Epi 1:4

wun. ²¹ Juog ngaa atihng Jeacuu maalo yi thoo ucube ruohdh yihrgo ayiihu kaa bang Jeacuu, noono e yiiho gihru kedea gaahno gihru naa yi cing Juog.

²² Awaahn ni Juog adhemuohme giihu ge aluoge oogo bang naa ayiihu lume ge adiehr. Ke nying gihn ni e kare nud unud nyaahre yi cwihnyu ke nying kwaad dhaano utaahngo, adoohng e yaa akuud yiiho ge neehn wun. Kea noono nahgu nyoge me nyaar rogu ke cwihny cang. ²³ Wu anyuol nyaahn. Wu kuu atuohl ke rih kohnh dhaano ge rahny, abea wu atuohl ke rih kohnh Ngad Boadh nyoge ge be rahny. Kohnh Ngad Boadh nyoge yoad kaa dhe yoohn lum Juog ge kahl kuowo me guge tooro kedea lum ngo be yiid. ²⁴ Bang gihn kohnh dhaano ngo neehn lum ge tal kedea tee dhaano utaahngo neehn thiiw ge lwaar oogo. ²⁵ Abee lum Juog ree be waare. Lum nu e naa Ciig Beer gihn anaa apuohny yihru.

2 ¹ Noono wiiu yug giih me reje kedea wiiu giih toohd maa giih waane. Wiiu nyahg kedea wiiu waaj nyoge. ^{2–3} Awaahn ni ngo aniidu e ka beer Jeacuu ke wun. Nea wa maano keá wiiu tiihy giih adhemuohm kedea wiiu giih acamo. Nea wa maano kea nahge ke giih Paar Juog ge ne cubu yi cwihnyu wa mar nyethiin ge cub cwihnye rih caag men. Tiihy giih nu bang udoongu yi lum Juog.

⁴ Awaahn ni beehnu bang ngaa neehn meehn wod gihn anaa akweer yaa geere keehde maa abeehn Juoge ngo ne kwanyo bang gihn e naa anhyaar Juoge. ⁵ Wu thiow, wu neehn meehn wod gihn ugeer Wahy Juoge wod Juog keehd gen. Wu akwany beere wu udoohng ne yaa lam me Wahy Juog e naa akwany wun yihrgo Juog. Noono e giih lamu ge nyaar Juoge nyaaro ke nying Jeacuu Kriihjto. ⁶ Ngo agweed yi kitaab Juog naa,

“Beeh niidu kaa akwany meehn wod maa anhyaara

me maga wiih wod keehde.

Wod gihn ageera yi geen Jaayon.^a

Ngaa yiih luma

cwihnye buu udaag yi gihn utiihya yihre.”

⁷ Yihru wu yaa ayiiho, ngaan akwany ngo anhyaaru abea yihrgo yaa kuu ayiiho,

“E naa kaaw gihn akweer yaa geere keehde e adoohng ne meehn gihn amag wiih wod keehde.”

⁸ Thiow agweed yi kitaab Juog naa,

“Ngaan akwany Juoge

e nuu unahg leen cwahny nyoge keehde

ge umeehg gen pahdho.”

Yaan nu ge nyoge maa acwahnyo bang gihn lum Juog kuu ayiih gene kedea e naa gihn agweehg Juoge ke nying gen.

⁹ Abee maru wu beehda nyoge me Juog e naa akwany wun. Wu beehda yaa lam me tiihyo yihrgo Ruohdh. Wu nyoge maa acub rogu yihrgo Juog, wu beehda joe. Noono, e kare nud yihru unyoadh kaa akahl Juoge wun oogo yi muudho kedea ukedhe wun yi daahr gihre me cang ne wij wij kedea wu ukwany ne rob giih beeye ge atiihye. ¹⁰ Umodho coon wu kuu anahg yaa Juog abea awaahn ni wu beehda joe. Coon Juog cwihnye kuu anaa aduue caahn ke nyingu abea awaahn ni ngo ayoadu kejea cwihnye aduue caahn ke nyingu.

¹¹ Wu goma me nyaara nyaaro keraahyo, wu neehn aleye me beed wiih waahdh me piny me beedu tooro. Naa anahgu nyoge me wa gihn nu kea cwihnyu keá yuohd rog giih nyaar dhaano utaahngge ge yihrgo gen ne mahn keehd wahy dhaano. ¹² Beehdu beer mee kiin yaa kuu ayiiho keehd maano koohb gene kejea wu tiihy giih me reje, bang gihn cahng ungey gene gihn beer ge atiihyu, e Juog uleej gene cahng beehn Jeacuu ne lieh won.

Wuoru Ruohdh Paajo

¹³ Wuoru ruohdhe giih wiih piny kan ke nying Jeacuu Ruohdho, wuoru ruohdh duohng yi paajo. ¹⁴ Thiow wuoru kwaad yaa acub ruohdh duohngge piny nyum nyoge ne kihm yaa ayug giih me reje, maa ne muohj koohdh yaa yug giih beey.

¹⁵ Beehda Juog e ne daahd wun utiihyu gihn me beer beere yaa kwihj luube ge be rubo rogu. ¹⁶ Beehdu ke beehd nyoge me padh baahng, abea kwaad beehd nu keá logu ne dhe yooh me koolu giih reje ge yugu. Wu dhiil nahg baahng giih Juog. ¹⁷ Nyoge keá dhahlu kedea nyaaru wadu ge ayiiho, wuoru Juog kedea wuoru ruohdh gihn amag paajo.

¹⁸ Wu baahng wuoru yaa tiihy yihrgo gen kedea tiihy gihn teed gene yihru. Wu keá lihng luub yaa beey cog, lihngu luub yaa reje thiow. ¹⁹ Ngo beehda gihn me beer uyoahd gihn me raaj ke nying gihn me beer maa atiih bang gihn ngahy gihn daahd Juoge. ²⁰ Gihn me beer me yoadu tooro ne guum apoothdo gihrgo gihn me raaj e ayug dhaane. Abee Juog wu udooje ne guum giih raahm me gihn me raaj maa ayugu tooro. ²¹ Wu acuohn kaa nying gihn ni: Ngad Boadh nyoge ke ngude abang uguume giih me reje ke nyingu kedea wu naa awiie piny ne yaa ukwany yihdh buy tiene. ²² Adhemuohm maa atiihy Jeacuu atooro kedea toohd maa arobe atooro. ²³ Naa abeehn nyoge ueny gene ngo e dhe kuu ne kweg uluunye kedea naa ayoadu giih raahm kuohm e ngaa maa acehme tooro. Ree acube yihrgo Juog ngaa be luuo ke lug tiel. ²⁴ E ke ngude adhemuohme giihu ge atihngge ke en e ngo ne rih yaadh maa ariihw, beere giih adhemuohm be cahgo ke tiihyo unahge giih beeye ge ne tiihyo. Kuohn ka me ledhe giie ge naa athiehdh won. ²⁵ Bang gihn wu ake roomo wa roohme maa arwaahnyo, abea awaahn ni wu aduu bang ngad kwaah ge koar wun.

^a2:6 Beehda Jeruusalem e gihn nu cuohn ne Jaayon, Yicaaya 40:6-8

1:21 Ruohdh: 5:1; Rom 5:2 1:22 2:17; 3:8; 4:8; Rom 12:9; Gal 6:10; 2Pii 1:7; 1Jon 4:11 1:23 Jon 1:13; Judea 4:12; Jeam 1:18
1:24-25 Jeam 1:10-11 2:1 Epi 4:25; Jeam 1:21; 4:11 2:2 1Kor 3:2 2:5 2:9; Rom 12:1; Epi 2:21-22 2:6 Rom 9:33 2:7 Mat 21:42;
Tiihy 4:11 2:8 Rom 9:33 2:9 1:2; Tiihy 26:18; Rom 5:17; 2Kor 4:6; Epi 5:8; Tii 2:14; Judea 13:12; 1Pii 2:5; Any 1:6; 20:4
2:10 Rom 9:25 2:11 1:1, 17; Rom 7:15, 17-23; Gal 5:17; Judea 13:14 2:12 Mat 5:16; 2Kor 5:10 2:13-14 Rom 13:1-7; Tii 3:1
2:15 3:16 2:16 1Kor 6:11, 19-20; Gal 5:13 2:17 1:22; 3:16; Mat 22:21; Gal 6:10; Pihp 2:12 2:18-3:7 Epi 5:21-6:9
2:18 Epi 6:5-8 2:19-20 5:12 2:20 4:14 2:21 Mat 16:24; 20:26-28; Jon 13:15; Rom 15:5 2:22 Jon 8:46; Judea 4:15
2:23 3:9; Mat 26:55-56, 67; 27:14, 27-31 2:24 Rom 6:2, 11; Klo 2:14; Judea 9:28 2:25 Mat 9:36; Jon 10:16; Judea 13:20

Maahn Kedeá Cuow Gen

3¹⁻² Wu maahn, tiihyu kwaad gihn arob cuowu yihru. Tiihyu gihn daahd gene keehd me kweer gene ke lihng lum Juog e lum Juog udhiil gene ke yiiho ke nying gihn beehdu beer ke gen. Dhe yoohn beehdo beer gihru ke gen akaal wiil luub na robu yihr gen ke nying Juog. ³Wudhu keá paru kejea kahd wihj ke wuohbo kedeá ruug rog ke tiy wale ngaab waare me ne jieng jieng ge ne yug wun ne jur. ⁴Jur me ne cohg naa yi nud cwihny kedeá e naa juro me be thum maa e ne nyaar Juoge bang gihn ngo beehdo e beer. ⁵Bang gihn maahn acoon, ge anhyaar Juog, cuow gen na wuor gene wuoro e naa gihn anahg gene jure. ⁶Wa mar Caara naa awuor Abraahm cuore ucuohne ngo cuohno ne wur paare. Nea gihn me ne cohg atiihyu kedeá uutor gihn me tudu yihre e wu unahg kwaay Caara.

⁷E wu cuow thiw yi beehdu gihru ke maahn ngahyu ngo kejea tee gen be room ke tee maru. E naa gihn dhiilu gen ke wuoro thiw bang gihn Juog muuny gihre ge yoad kuowo me be gug buu ucube ke yihru cog, ngo ucube yihr maahn thiw. Beehdu ke maahnu wa gihn nu beere gihn me gahl kwaj gihru yihr Juog tooro.

Raahm Rog Yoad Yi Tiihy Gihn Me Beer

⁸Lum ni beehda ke nyingu cang: beehdu ke beehd yaa paajo acielo. Beehdo me wudhu be tihngu maalo. Beehdo me yej amad kedeá nyaaru rogu ke dhog yiehdhe beehde. ⁹Wiil gihn me raaj keá coalu ke gihn me raaj kedeá wiil ayaany keá duogu kaa ayaany. Abea nea kaa ngo ne cohg kwayu Juog ukonye yaa nu bang gihn wu akwany Juoge ne tiihy giil nu, beere Juog wu dooje dooj. ¹⁰Wa kaa agweede yi kitaab Juog naa,

“Kwaad ngaa daahd ngo uyoade wahy,
maa uniide giil me beeye kea koare leebe,
kedeá dhe keá meehge rob toohd.

¹¹Wiie tiihy gihn me raaj uloge wiie ne tiihy gihn me beer.
E thiw doohre nyoge doohro.

¹²Juog wonge be loge oogo rih ngaa abiohgrwaal,
kedeá kwaj gihr ngaa maa abiohgrwaal lihng lihng ne cohg.
Abea yaa tiihy giil reje,
Juog wonge beehde aloge oogo rog gen.”

¹³Ngaa e ne kedh ngwiil rihi nea yih nyaar yug gihn me beer? ¹⁴E thiw keehd me yoadu ngwiilo ke nying tiihy gihn me beer, e ngo beehda dooj. Wu keá tud yihr gen wale keehd koohdhu keá paahr. ¹⁵Abea nahge ke gaahn Ngad Boadh nyoge e ne cubu yi aduunu kedeá nahge en e naa Ruohdhu. Nea wu ke peehnyo ke nying gihn gaahnu Ngad Boadh nyoge ke nyinge kea beehdu e ka beehru ngo kii ngo ngahyu. ¹⁶Kedeá beehru wiil lum gen ke lubo me beer kedeá ke wuohdo. Duogu wiil lum nu e gihn me dieru ke nyinge tooro kedeá ke dhe yooh me beere wudh yaa rob giil me reje rogu, wu ge yaa batien Ngad Boadh nyoge, wudh gen ulaahyo ne ngahyu rob. ¹⁷Ngo ngweehn uoad dhaane bahng ke nying tiihy gihn me beer, nea gihn ngo beehda kar cwihny Juog, yihr man yoad bahng yi tiihy gihn me raaj. ¹⁸Ngad Boadh nyoge ke ngude athow ne cielo ke nying adhemuohme giil nyoge cang, Ngad Boadh nyoge ge beehda abiohgrwaal athow ke nying yaa reje. Ngo athow beere wo kedhe ke Paar Juog. Anahg kuohme en naa athow abea wahye ge akuowo. ¹⁹Noono maa a'aaye uwiie kuohme piny ne ci ne puohny Ciig Beer yihr atiihbe giil anaa acoon ge amag ne maabuuye. ²⁰Atiihbe giil yaa acoon yi run Nooh ge anaa akweer ke lum Juog. Yaa anaa abuhj Juoge ke koar gen e cwihny kuu angol rog gen kaano anaa geer Nooh yaahy geero. Noono unahge ke nyoge abiihbedahg cog ge naa abodh e ge kuu amud. ²¹Piil nu amud nyoge anyoadh dhe yoohn nud awaahn ni ge yoad piil luogwahy uwoj gen yi wiil dhaano ne cub luogwahy. Luogwahy e ne cub boadh wahy yihr dhaano. Piil woj wihj ge be luog nyoro oogo rog, abea ge nyoadh ngo kejea dhaano ree akuohng nyum Juog ne beehdo ke dhe yooh me beer. Kedeá piil nu wahy dhaano boadh gene boadh ke dhe yoohn abeehn Jeacuu Kriihjite ucahre. ²²Jeacuu Kriihjto e naa ngaa acidh Maalo kedeá upiie ukwiilhy Juog yi ruohd. Kedeá uyug Juoge ngo ne ngad duohng yihr wuohdjuog maa yihr ruohdhe giil atiihbe.

Cub Rog Yihr Juog

4¹Wa kaa ayoad Jeacuu raahm rog, e wu thiw gwiiru rogu uparu giil raahm rog wa mar Ngad Boadh nyoge. Bang gihn ngahyu ngo kejea raahm kuohm e ne kahl dhaano oogo yi cing adhemuohm. ²Kedeá wu buu unahg nyoge me koag ke log cwihnyu rog giil adhemuohm uwahdhe cahng thoo. Wu unahg nyoge me koag ke log cwihnyu yi tiihy gihn daahd Juoge. ³Yihd run abar wu abuhj ke tiihy giil reje ge nyaar yaa kuu ayiil lum Juoge. Giil reje me neehn bal kedeá maadh kuong, maa tiihy giil cwaahne maa maang pey yiehdhe me neehn aroap, maalo, macaahrdiid, bang gihn ge be nyaar Juoge. ⁴Naa angolu tiihy giil nu ne ngwedh e nyoge ge agaahy. Noono e ge apiil ne rob giil me reje ke nyingu. ⁵Giil nu rob gene rogu ge keá cubu yi cwihnyu bang gihn giil gen noono tiihy gene, yihd gen ubeehn gene ne kwanyo yihr ngan agwiir ree ne beehn ne ngol lubo yihr yaa kuow maa yaa athow. ⁶Ke nying gihn nu e naa apuohny Ciig Beer yihr yaa athow, beere keehd maa akihm koohm gen wa ka kihm dhaano ukar upiny kan, e wahy gen dhiil rom kuow wa mar Juog.

⁷Wun, paru wudhu uyabu nyingu maa koaru rogu ne kwaj ne cohg bang gihn gug nyepiny cang acahngo. ⁸Gihn wiie ne maalo beehda nyaar rog bang gihn nyaaro adhemuohme wuunye ke oogo. Nyaaru rogu naa aciel acielo ke keewu cang. ⁹Loru weehle yihd miehyu ke mihn cwihny. ¹⁰Juog wu amuoje kaa amahr muuny me be room me romu

3:1 1Kor 7:16; Epi 5:22-24 3:3 1Tim 2:9 3:7 Epi 5:25-28; 1Tim 2:8 3:8 1:22; Epi 4:2-3; Pihp 2:2-3
3:9 2:23; Mat 5:44; Rom 12:17 3:10-12 Jeam 1:26 3:13 Rom 13:3 3:14 4:14; Mat 5:10 3:15 1:3-5; Klo 4:6 3:16 2:15
3:18 2:21; Rom 5:6-8; 6:10; Judea 4:15; 7:27 3:19-20 2Pii 2:4; Juud 6 3:21 Rom 6:3-4; Judea 10:22; Ukwiih; Mat 22:44; Rom 8:34; Tiihy 2:33 3:22 Tiihy 1:9; Epi 1:21 4:1 2:24; 2Kor 4:10; Gal 5:24 4:2 2:21 4:3 Gal 5:19-21; Epi 2:3; Tii 3:3 4:5 1:17; 2Tim 4:1
4:7 1Kor 10:11; 1Th 5:5-8; 1Jon 2:18 4:8 1:22; Jeam 5:20 4:9 Judea 13:2 4:10 Rom 12:6-8

tiihy nyepinye. Ngaa keá piih wiih muuny acub yihre. Dhiilu muunye ke nywaag e cwihny be daag keehd nyoge beere ge dooj Juoge dooj thiw. ¹¹ Ngaa puohnyo e gihi robe nahg gene luub Juog kedea ngaa tiihyo dhiile tiihy ke tee acub Juoge yihre. Noono gihn nu e Juog ke leeyo yi kwaad nyepinye cang, ke nying Jeacuu Kriihjto ge e ne wuur kedea e ne yihre ne tee me guge tooro. E noono.

Giih Ajohr Ge Yoad Ngaa Maa Ayiiho

¹² Goma maa anhyaara keraahyo, cwihnyu keá daag kejea gihn me maahn en naa atiihy ree yihru nea gihi ajohr ge pahdh wudhu. ¹³ Mihn cwihnyu bang gihn ayoadu gihi ajohr wa mar Ngad Boadh nyoge. Kaano arumo e cwihnyu umed keraahyo cahng uduue e kaa amoar Juoge wiie anyoadhe. ¹⁴ Nea wu acay ke nying Ngad Boadh nyoge, e gihn beehda dooj bang gihn ngo nyoadh ngo kejea Wahy Juog, e yihre ne tee, ngo ne rogu. ¹⁵ Nea wu ke joohero e ajohr keá beehno kaa nying nahg dhaano, wale ke nying kahw, wale tiihy gihn me raaj wale paahr yi gihn me nying dhaano tooro yea. ¹⁶ Ngaa yoad gihi ajohr ke nying gihn ayiihe Jeacuu, e wiie keá laahy, abea muohje koohr Juog ke nying gihn amade ngo kiin yaae. ¹⁷ Nihn ngol lug piny ge acahngo kedea lug thub ke wudh yaa ayiih lum Juog. Nea wo ge ayiiho e ne thub luge wudho, nea unahg mar yaa kuu ayiiho, e gihn upahdh wudh gen unahg gihn me teeg. ¹⁸ Wa kaa agweede yi kitaab Juog naa,

“Nea ngo teeg yihr yaa abiohgrwaal uyoad gene boadh wahy,
e mar yaa kuu ayiiho kedea yaa adhemuohm unaa ngihde?”

¹⁹ Nea wa gihn nu kea beehn yaa ayoad gihi ajohr wa ka daahd Juoge cub gene rog gen yihr Juog, Juog ge be waar lume kedea bar gene maalo ke tiihy gihi beeye.

Yihr Yaa Doonge Kedea Yaa Rihj

5 ¹ A ge beehda ukiihj wa wun kedea a ge aniid kaa ajoohr Jeacuu Kriihjto kii ngo kedea ngo ngahya kejea boadh wahy uyoada, nyingu kwaya kwayo wu ukiihye, ² ungahyu nyethen Juog ke kwaago beer mee. Kaahnu gen beer mee padh ke nying dhaano maa ater wun yi tiihy nu, abea bang gihn beehda tiihj, me wu naa apar ngo wu keedu wa ka daahd Juoge. Kedea padh tiihj maa adeehju yi cwihnyu ke nying koog. ³ Ge keá kaahnu ke cing nyooro, kaahnu gen beer bang ungoor gene kaa atiihyu kii ngo. ⁴ Kaahnu gen beer mee beere muuny me guge tooro yoadu yoado bang Jeacuu ngad kwaag wun.

⁵ Wa gihn nu thiw, wu yaa rihj lihngu lum yaa doonge kedea konyu rogu konyo ke dhe yooh me dhaano ree be leeye. Keá ngaa beel wa kaa agweede yi kitaab Juog naa,

“Juog be daahd ngad nhyaam
kedea muuny gihre cube ke yihr ngaa me padh ngad beel.”

⁶ Nahgu nyoge me padh yaa beel nyum Juog ge yihre ne tee me duohng beere cahng pare ngo e wudhu tihnge ke maalo. ⁷ Wiiu gihi dieru ke nying gen yi cinge bang gihn e naa ngaa kwaag wun.

⁸ Ngahyu rogu ke kaahno bang gihn atiihb ukeehg ngad mahnu ngo uwihno ne daahd ngaa me dwaahnge wa gihr nguu maa awaahdh ge cej ngaa me came. ⁹ Rogu keá meehgu dwaahngo yihre kedea magu yi yiho gihru teeg mee kedea ngahyu ngo kejea kwaad gihi ajohr ge ayoad wun ge ke tiihyo rog yaa ayiiho ke bang upiny cang.

¹⁰ Juog ngaa cub muuny, ge acuohn wun yi dhaahre ne beehdo tiehd ke Jeacuu Kriihjto, ubeehn ke ngude ucube thaahdhu piny beer mee uyuge wun teeg ubahnge yiho gihru yea be lwagu batien kaa abuhju yihdh gihi ajohr.

¹¹ Kedea e ne yihre ne tee me guge tooro. E noono.

¹² Beehda warga me thiin mee e gihn agweeda yihru kedea ngo acuba yi Cihla. Cihla, nea ke kur mara, e ngo umiiho maa ayiih lum Juog ne cohg. Ngo gaahna gaahno kejea wargahng ni cwihnyu umeehge teehtng bang gihn, dhe yooh maa adiehr, ge beehn Juoge udoge nyoge, ngo agweeda yihru. Dhe yoohn nu, baru maalo keehde.

¹³ Akuud yaa ayiih ge beed geen Baabihloanya ge akuud gen akwany Juoge wa akuud maru, wu amaahdh gene kedea Maarko waahda ke nying Jeacuu wu amaahdhe. ¹⁴ Maahdhu rogu naa aciel acielo ke cing apaar.

Beehdu ke yoohm rogu wu yaa anweehd Juoge ke Jeacuu Kriihjto.

4:11 Rom 12:7; 1Kor 10:31; 12:8; Jeam 3:1 4:12 1:7 4:13 5:1; 2Kor 4:10; Rom 5:2

4:14 2:20; 3:14; Mat 5:10-12; Mak 13:11; Tiihy 7:55 4:16 2Tim 1:8 4:17 2Th 1:8 5:1 1:21 5:2 Jon 21:15-17; Tiihy 20:28; 1Tim 6:5

5:3 2Kor 1:24; Pihp 3:17; Tii 2:7 5:4 1Kor 9:24-25; 1Pii 1:4 5:5 Epi 5:21; Jeam 4:6 5:6 Jeam 4:10 5:7 Mat 6:25-30; Pihp 4:6

5:8 1Th 5:5-8 5:9 Epi 6:11-12; Jeam 4:7 5:10 1Th 2:12 5:12 Cihla: 1Th 1:1 5:13 Maarko: Pihl 24